

cum esset Pontifex anni illius, dixit eis: Vos nescitis quidquam, nec cogitatis, quia expedit vobis, ut unus moriatur homo pro populo, & non tota gens pereat. Hoc autem à semetipso non dixit: sed cum esset Pontifex anni illius, prophetavit: quod Iesus morturus erat pro gente, & non tantum pro gente, sed ut Filios Dei, qui erant dispersi, congregaret in unum. Ab illo ergo die cogitaverunt ut interficerent eum. Ioan. 11. v. 47...53.

*I. C. abiit in Ephrem cum Discipulis paulo ante Festum Paschæ.*

CXVI. Iesus ergo jam non in palam ambulabat apud Iudæos, sed abiit in regionem juxta desertum, in civitatem, quæ dicitur Ephrem: & ibi morabatur cum Discipulis suis. Proximum autem erat Pascha Iudæorum, & ascenderunt multi Ierosolymam de regione ante Pascha, ut sanctificarent se ipsos. Quærebant ergo Iesum: & alloquebantur ad invicem in templo stantes: Quid putatis quia non venit ad diem Festum: dederunt autem Pontifices, & Pharisei mandatum, ut si quis cognosceret ubi sit, indicet, ut apprehendant eum. Ioan. 11. vers. 54...56.

*I. C. petens Ierosolymam jam tertio prædicat Discipulis suis passionem, & mortem suam.*

CXVII. Erant Discipuli in via ascendentes Ierosolymam, & præcedebat illos Iesus, & stupebant, & sequentes timebant. Et assumens iterum & secretò duodecim, coepit illis dicere, quæ essent ei eventura: Quia ecce ascendimus Ierosolymam, & consummabuntur omnia, quæ scripta sunt per Prophetas de Filio hominis. Filius enim hominis tradetur Principibus Sacerdotum, & Scribis & Senioribus, & condemnabunt eum morte, & tradent eum gentibus: & illudent ei, & conspuent eum, & flagellabunt eum, & interficient eum, & tertio die resurget: at ipsi nihil horum intellexerunt. Matth. 20. vers. 17...19. Marc. 10. vers. 33. 34. Luc. 18. vers. 31...34.

*I. C. matris filiorum Zebedæi petitionem arguit: humilitatem suis commendat.*

CXVIII. Mater filiorum Zebedæi cum filiis suis Iacobo, & Ioanne à Christo petit, ut sederent illi, alter ad ejus dextram, alter ad sinistram in regno & gloria sua. Respondit Iesus: Illos nescire quid peterent, easque sedes jam aliis à Patre suo concessas, Discipulisque decem aliis propter hanc petitionem indignantibus, Christus eos ad se vocat, docetque inter Principes Gentium majoribus primas sedes concedi: sed inter ipsos quicumque voluerit primus esse, hic erit omnium vestrum minister & servus. Sicut & Filius hominis non venit ministrari, sed ministrare, & dare animam suam redemptionem pro multis. Ex Matth. 20. v. 20...28. Marc. 10. vers. 35...45.

*I. C. prope Iericho cæco misericordiam petenti visum verbo reddit.*

CXIX. Cum appropinquaret Iericho, cæcus quidam sedebat secus viam, mendicans. Et cum audiret

turbam prætereuntem, interrogabat quid hoc esset. Dixerunt ei: quod Iesus Nazareus transiret; & clamavit dicens: Iesu Fili David miserere mei: & qui præibant, increpabant eum, ut taceret; ipse verò multò magis clamabat: Fili David miserere mei. Stans autem Iesus iussit illum adduci ad se, & cum appropinquaasset, interrogavit illum: quid tibi vis faciam? & ille, Domine, ut videam. Et Iesus dixit illi: Respice, fides tua te salvum fecit; & confestim vidit, & sequebatur Iesum, magnificans Deum, & omnis plebs, ut vidit, dedit laudem Deo. Matth. 20. vers. 29...39. Marc. 10. vers. 46...52. Luc. 18. v. 35...43.

*I. C. perambulans Iericho Zachæum publicanum interpellat, & ad ejus domum divertit.*

Et ingressus perambulabat Iericho, & ecce CXX. vir nomine Zachæus, & hic princeps erat Publicanorum, & ipse dives, quærebat videre Iesum, quis esset: & non poterat præ turba, quia statura pusillus erat, & præcurrens ascendit in arborem ficomorum, ut videret eum, quia inde erat transiturus: & cum venisset ad locum suspiciens Iesus vidit illum, & dixit ei: Zachæe, festinans descende, quia hodiè in domo tua oportet me manere: & festinans descendit, & excepit illum gaudens; & cum viderent omnes, murmurabant, dicentes: quod ad hominem peccatorem divertisset. Stans autem Zachæus dixit ad Dominum: Ecce dimidium bonorum meorum Domine do pauperibus, & si quid aliquem defraudavi, reddo quadruplum. Ait Iesus ad eum: Quia hodiè salus domui huic facta est, eo quod & ipse sit filius Abrahæ. Venit enim Filius hominis quærere, & salvare, quod perierat. Luc. 19. vers. 1...10.

*I. C. in domo Zachæi parabolam dat de decem Minis.*

Adjecit Iesus parabolam de nobili in regionem longinquam abeunte, ut Regnum acciperet, & è quo quod reversurus esset dat servis suis Minas decem, ut negotiarentur; reversus præmia aut poenas servis dedit. Cives quod se odisse testati essent, omnes è Regno ejecit. Parabola hæc de Christo, de Discipulis, & de Judæis est. Luc. 19. v. 11...27.

*I. C. egressus è Iericho cæcos duos illuminat.*

Euntibus illis, (Iesu & Discipulis) de Iericho cum turba multa, ecce duo cæci sedentes secus viam audierunt quia Iesus transiret: & clamaverunt, dicentes: Domine miserere nostri, Fili David. Turba autem increpabat eos, ut tacerent: at illi magis clamabant dicentes: Domine miserere nostri, Fili David: & stetit Iesus, & vocavit eos & ait: Quid vultis ut faciam vobis? Dicunt illi: Domine ut aperiatur oculi nostri. Misertus eorum Iesus, tetigit oculos eorum, & confestim viderunt, & secuti sunt eum. Matth. 20. vers. 29...34.

Marcus de unico cæco, qui fuerit Bartimæus Timæi filius hinc agit, fortèque eadem est cum superiori, antequam Iesus ingrederetur Iericho, D Histo.